

難提品第二十六(十四偈)

昔惟衛佛世	我施煖浴室
一洗比丘僧	便自發願言
令我與是等	尊眾共集會
世世得清涼	離欲無垢塵
端正常徐好	清淨若妙花
於彼壽終後	便得生天上
在天上人間	顏色好端正
世世所生處	所住大勢尊
於彼壽終後	來還生人間
諸天及人民	見我無厭足
見辟支佛塔	繕治泥整頓
聖飾令鮮白	於上懸幡蓋
我時自發願	欲求得相好
金體紫磨色	端嚴無有比

因是所作福	生波羅奈國
於脂惟尼生	作子無患害
見迦葉佛塔	其心為歡喜
輒詣其寺中	豎立承露槃
用是施塔故	及治聖飾塔
興建剎柱槃	受福不可量
從彼有餘福	於是最後世
生釋氏王家	便為佛之弟
我身自然有	大人之相好
莊嚴成羅屨	平等布三十
佛普見說我	端正最第一
已除盡諸漏	逮得甘露句
難提父母子	於比丘僧中
於阿耨達池	自說本所作